

Yungzsuij: Mbanjcuengh “Guh Doengznienz” Angqhoh Ciengmoq

Ndwen 2 ngoenz 14, Aen Hezvei Venz Yungzsuij Myauzcuz Swciyen bae daengz Anhdai Yangh Gyanghcuiz Cunh Mbanjcuengh Dadunghgyangh, caeuq beixnuengx Bouxcuengh haiguh “guh doengznienz” hozdung cienzdoengj, dangdieg ca mbouj geijlai baenz cien boux beixnuengx Bouxcuengh caeuq gyoengq “doengznienz” daj ndaw singz daeuj haenx doxcomz giz ndeu, boq venz, diuq foux Myauzcuz, ciengq go Myauzcuz daengj, angqhoh ciengmoq cietndei.

“Guh doengznienz” dwg gij hozdung gyau youx youq mbanj caeuq mbanj minzcuz vunznoix dangdieg haiguh, eiqsei dwg gyau baengzyoux, bingzciengz youq mboengq ndwencieng guh, vunzmbanj caeuqfaenh hozdung dox heuhguh “doengznienz”.

(Lungz Linzci/龙林智)

► Beixnuengx Bouxcuengh caeuq Myauzcuz caez boq venz caijdangz.



Gunghcwngz: Mehmbwk Caeuqfaenh “Lungz Foux Saeceij Diuq Hoh Ciengmoq” Comzyienj Hozdung

Ndwen 2 ngoenz 12 daengz 13, “lungz foux saecej diuq hoh ciengmoq” lungz saecej comzyienj hozdung youq Gunghcwngz Yauzcuz Swciyen banh, 12 aen doih foux lungz foux saecej Gveilinz Si caemh daiz yienj dinfwngz, daeg-bied dwg doih foux lungz foux saecej mehmbwk hwnj ciengz, engq dwg yinx ndaej bouxhek caeuq vunzmbanj yawjngonz, gyalai gij heiq-faenh ndwencieng angq-yangz.

(Cwng Ciminj/郑智敏)



▲ Doih foux saecej ndaej daengz bouxgeq lwngyez haenggyaez.



▲ Gingjndei gyaeu lumj veh.

Lungzswng:

Mok Goemq Nazmbaeklae Gingjndei Yinx Hek Daeuj

Ndwen 2 ngoenz 12, fwn doek gvaq le fwjmok hoenzngeungeu youq gwnz nazmbaeklae Lungzciz Lungzswng Gak Cuz Swciyen Gveilinz Si, nazmbaeklae caeuq aenmbanj youq gyang fwjmok neix lumj muiq lumj yienh, baenz fuk dem fuk doz gingj seizcin gyaeunde, yinx ndaej bouxhek daeuj yawj nyauznyauz.

Geij bi neix daeuj, Lungzswng Gak Cuz Swciyen baengh gingjsaek daegbied caeuq yinzvwnz gingjgvanh nazmbaeklae Lungzciz, doenggvaq gij hingzsi “gunghshw + nazmbaeklae + nungzhoh” haifat le lijyouz nazmbaeklae baengh nazmbaeklae dajndaem caeuq aenmbanj vunz youq haenx, yied daeuj yied lai vunzmbanj doenggvaq hwngfat lijyouz lajmbanj saedyienh vut gungz baenz miz.

(Banh Cisiengz/潘志祥)



▲ Bouxhek daeuj yawj gingjndei nyauznyauz.

Gveilinz: “Rumzcin Hengzdoengh” Bang Rengz Couhnieb



▲ Boux ra hong youq hoih ciu vunz yienhciengz camcaz gangjvei saenqsik.

Ndwen 2 ngoenz 14, aen yizsi hainduj Gveilinz Si bi 2019 “rumzcin hengzdoengh” nem aen hoih yienhciengz ciu vunz Cenzcouh Yen cienjsenj goengrengz lajmbanj couhnieb youq Cenzcouh Yen banh, aen hoih ciu vunz neix cawjdaez dwg “coicaenh cienjsenj couhnieb, bang rengz vut gungz gunggeng”, 200 lai aen giyez ndei daj Guengjdoeng, Sanghaij caeuq Gveilinz Si daengj daeuj haenx daezhawj ca mbouj geijlai fanh aen couhnieb gangjvei hawj boux ra hong, yinx ndaej haujlai boux ra hong daeuj caeuqfaenh.

(Vangz Swhcang/王滋创 Couh Yizginh/周怡君)